

## CONVENIO DE COLABORACIÓN ENTRE A AXENCIA TURISMO DE GALICIA E O CONCELLO DE OIA PARA O DESENVOLVEMENTO DO PROXECTO DE REPARACIÓN DA PASARELA PEONIL COLGANTE EN ACEVEDO (LOUREZA) E OS SEUS ACCESOS.

### MEMORIA XUSTIFICATIVA

O xerente de Turismo de Galicia

#### DECLARA:

Que esta Axencia Turismo de Galicia formalizou co concello de Oia o instrumento convencional arriba referido por un período de vixencia que abrangue dende o día da súa sinatura ata o 31 de decembro de 2021.

Que o instrumento convencional ten por obxecto establecer o marco de colaboración entre Axencia Turismo de Galicia e o concello de Oia para o proxecto de reparación da pasarela peonil colgante en Acevedo (Loureza) e os seus accesos.

Que existe converxencia de intereses entre as entidades asinantes en orden á consecución obxecto referido.

Que o instrumento convencional que se pretende asinar se **fundamenta** no seguinte:

**Primeiro.-** A Lei 7/2011, de 27 de outubro, do turismo de Galicia, establece que a Xunta de Galicia, propiciará unha ordenación racional, equilibrada e sustentable dos recursos turísticos co obxectivo de garantir o equilibrio territorial e, para conseguir este fin, establecerá as pertinentes canles de cooperación con outras administracións tanto estatais como autonómicas e locais, así como co sector privado.

A Axencia Turismo de Galicia é o órgano da Xunta de Galicia ao que lle corresponde o exercicio, entre outras, das competencias en materia de ordenación, promoción, xestión e fomento do turismo; e ten entre os seus obxectivos básicos levar a cabo accións de potenciación e desenvolvemento do turismo na Comunidade Autónoma de Galicia, como un factor de



crecemento económico, polo que entre as súas prioridades está a de contribuír á realización de actuacións que impliquen conseguir este obxectivo.

**Segundo.-** As entidades locais teñen atribuídas, a teor dos artigos 80 da Lei 5/1997, do 22 de xullo, de Administración local de Galicia e 25.2 h) da Lei 7/1985, do 2 de abril, reguladora das bases do réxime local, posto en relación coa Lei 7/2011, do 27 de outubro, do turismo de Galicia, competencias en materia de información e promoción da actividade turística de interese e ámbito local.

**Terceiro.-** Entre as competencias que, no relativo ás relacións coas entidades locais galegas, lle corresponden á Xunta de Galicia, de acordo co disposto nos artigos 194 e 195 da Lei 7/1997, do 22 de xullo, de administración de Galicia, está a de cooperación e colaboración, as cales se poden levar a cabo mediante a formalización de convenios, e para lograr esta finalidade a Axencia Turismo de Galicia, acomete, no ámbito das súas competencias, un decidido apoio ás iniciativas das entidades locais.

**Cuarto.-** O concello de Oia pretende arranxar a pasarela para utilización de peóns e ciclistas, que cruza o Río Tamuxe, nas proximidades do límite do termo municipal do Rosal con Oia.

A dita pasarela precisa reparar os accesos, polas mesmas razóns que conduciron á reparación da pasarela, é dicir a degradación dos materiais. Con iso poderase acceder á zona de Monte Redondo e a Cova do Lobo e nas que se pretende fomentar unha área de natureza.

A instalación estará en disposición de proporcionar un acceso peonil, integrado na paisaxe o máis posible, a través dun paseo sosegado cheo de cromatismo, desde onde se poderán observar praias fluviais con plantacións de todo tipo, zonas rochosas en escarpada pendente con pasos sobre arrosios, xunto coas zonas dedicadas ao repouso e recreo así como posibilidade de acceso a merenderos e embarcadiros.

O paso sobre o Río Tamuxe realizarase mediante a mencionada pasarela peonil colgante, que partirá da beira dereita do Río Tamuxe en Oia e cruzará o río á altura do P. K. 7+000 da PO-354, que dispoñerá de arranques para os cables de suspensión nuns macizos de formigón. Na parte dereita do Río Tamuxe, sen ningún complemento e na marxe esquerda coa interposición dunha pila que eleve os puntos de arranque dos cables de suspensión á cota necesaria.

A pasarela dispoñerá dunhas plataformas con entarimado do mesmo material sintético que as escaleiras e a propia pasarela, que substituirán aos existentes na actualidade que polo seu grao de deterioración non son aproveitables.



**Quinto.-** a celebración do Ano Santo Xacobeo nos anos 2021 e 2022 constitúe para a Comunidade Autónoma de Galicia unha oportunidade de potenciación de Galicia, así como de promoción e de reforzo da dimensión internacional do Camiño de Santiago e da propia comunidade

O Camiño Portugués pola Costa comeza na Guarda, localidade histórica que limita co país luso. Desde a altura, o Monte de Santa Tegra vivía o porto da Guarda. Esta montaña é famosa polo seu castro celta, os seus petróglifos, a súa ermida do s. XII e o seu miradoiro.

O percorrido continua polo Concello de Oia. Nesta localidade pontevedresa, o peregrino poderá descansar e descubrir, antes de continuar cara á seguinte etapa, unha xoia medieval do século XII: o mosteiro cisterciense de Santa María de Oia.

Por tanto o proxecto desta colaboración supón a posta en valor dos recursos turísticos do concello, o que tamén contribuirá á revalorización do turismo da Comunidade Autónoma.

**Sexto.-** A Axencia entende que é de interese público colaborar para a execución do obxecto antes descrito, co fin de incrementar e favorecer a atención e coidado ao peregrino, o que ademais suporá a súa posta en valor de cara á celebración do Ano Santo Xacobeo, o que incide na promoción e potenciación do Turismo en Galicia, non sendo posible promover a concorrencia, por ser o concello a entidade impulsora da actuación.

Que a través deste convenio, outórgase ao concello de Oia unha subvención directa en virtude do disposto no artigo 19.4 c) da Lei 9/2007, do 13 de xuño, de Subvencións de Galicia, polas razóns de interese público, expostas nos puntos anteriores e que dificulta a súa convocatoria pública, de conformidade co previsto no artigo 26.2.a) da Lei 9/2007 do 13 de xuño, de subvencións de Galicia.

Que os intereses converxentes das partes asinantes exclúen o ánimo de lucro, e non poden satisfacerse axeitadamente mediante a celebración dun contrato dos contemplados na Lei 9/2017, do 8 de novembro, de contratos do sector público, pola que se transpoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, de 26 de febreiro de 2014, ou doutro instrumento alleo á natureza estritamente convencional.



En atención ao exposto, e a fin de dar cumprimento ao preceptuado no artigo 15.2. da Lei 1/2016, de 18 de xaneiro, de transparencia e bo goberno, estímase xustificado o recurso á sinatura do instrumento convencional que se pretende, con exclusión doutras figuras.

E para que conste, asíñase esta memoria, en Santiago de Compostela  
O xerente de Turismo de Galicia

Emilio José de la Iglesia Lema